

## Egei Sasama Polha Timotikou Nalama Nei

### Tawale Ta

O Timoti eme Polbou de dabai degedi o. Polha sa Romkou didio mosodu duwoli tolo hafei degeimou, e kuguo kou nalama o takou neimou mala ile, Timotikou kuhe nei.

Polha nalai kaha sibigebe kou gue, Timotihage damaleyodei ke tatabai degeba, Yesuha ta hehegiedi ke tou fogou dayedemamou kuhe nalai. E Godiha ta defeido seseligi, obe emokou hagi neibane, tabou meiyode tobou yedei.

Haba tabe, Timotihage ogou gai egeibe hobou du-dayedei. Polha you e midihonou seseyedei.

Kuguo 2 Timoti kumaha sibige kaha widio ta hiyebetanou fei dala.

Timotibe dabai neledo dege degeligi,  
damaledo Godiha dabai degedi o degeyedei

### (Ta Hiye 1-4)

<sup>1</sup> Ame Pol, Yesu Kelesuha ta-bolofei-mala-siadi-o. Godi you tagaiya ke ame obe Yesu Kelesukou damaleyodemaba tofousogo tofousogo tofolou kaha ta mala siadi o degedema makai.

<sup>2</sup> Timoti, name ma dihi, a namokou hoho degeimou, kuguo kou namokou kuhe nalama neli. Aye Godibou,

di Hiye O Yesu Kelesubou dilie namokou solou do dege, habagugueguba, na bologuado dalale.

*Di ta uwo bolofei ke tobolou be hobou gue degedame*

<sup>3</sup> Ma kou guai o kedia Godiha dabai degele idi sagai kenou tefele ane degeli. A dabai degemou iligibe, ma dule-dune bolonou daladade tawali. A Godikou bolofeyodema, e na dogou guyadomou, agalibou huliamebou de diho baga tobou di. <sup>4</sup> A na fogou imou, na ma sihou gosoumou dugu ke tawalemou be, haba na dugulo sagai degeli, na duguoba, hoho degelamou. <sup>5</sup> Ne fimai be sudo mei, age name Yesu Kelesukou damaleyodei ke kou tobolou imou du. Ne abou Loisbou, ne adiou Yunisbou dilie damaley-odele i sagai kenou tefei, nane damaleyodei ke a tewe. <sup>6</sup> A na tawayadomou tobolou be, afu, a namokou dobogou dogoguo diho baga tobou kelege, Godiha namokou e nele ke solou do nei keme totou degedayedemamou kuhe tobolou. Godiha namokou e nele ke nei kaha degemou, na e neleya ke dabai defeido dege. <sup>7</sup> Duo Bolofei, Godiha dimokou nei keme di gue degemabadomou neli mei, haba di neledo degeba, o sasai diamokou solou do degeba, diyou di midihou ke defeido dia dalamabadomou kuhe nei.

<sup>8</sup> Kegei degemou, nage di Hiye Oha degedi kaha ta ke o sasai kediamokou hehegilebe, gue degeda. Haba ame e dabai degedi o kaha degemou kuhe didio degei kokou ne na gue degeda. Na Godiha nele ke malaba, abou de dogou guo hagi hebeleba ta uwo bolofei ke tobou me. <sup>9</sup> Godiha di mamolouyode tobou, dibe you e bi degelamou. Ege di midihou bolodo milolou ke duguomou makali mei. Younou

tagalemou, di mamou lamou kuhe makai, di solou do degemou. Damaledo, afudo, e bi ta milou li mei kelegebe, e Yesu Kelesuha di habagugueyede tobou. <sup>10</sup> Godiha kege kou tobou mamou dalali, habage di mamolou o ke kuhe tama degei. Eme Yesu Kelesu. E hagua, todi ke makoma mei degei. Ta uwo bolofei e tobou di ke e dimokou hehegiebe, dine tofigile ile mei, tofousogo tofousogo tofolou ileyode tobou.

<sup>11</sup> Godihage ame ta uwo bolofei ke mala hehegiemou siyadomou kuhe makai. <sup>12</sup> Kegei kaha degemou, ame hagi hiyedo duguo dalaye,\* kenou si a sidifi degeiyo mei. O a emokou damaleyodei keme age kou tewe. A tewe, dabai e amokou nei keme you bologuado dia dalaba ibe deba, uwage sawisie ke kuhe tama degele.

<sup>13</sup> Na o sasai kediamokou hehegiebe, Yesu Kelesukou damaleyodema, emokou hoho degeba, doudo ta, a tobou mou na kou dudi sagai kenou tefele hehegie tobolou dala. <sup>14</sup> Duo Bolofei di duledu dala, e neleya ke nage bi Godiha namokou nei keme defeido dia dala.

<sup>15</sup> Sa Esia o olou fei kediabou, haba o Figelus dilie o Hermogenes diliebou, dia olou fei a tou fogou fogou yai keme na kou tewe.

<sup>16</sup> Age Hiye Oha o Onesiforusbou e sosou bou diamokou solou do degele ke tagali, e amokou dedei sasagiei kaha degemou. Ege didio mosokou a dugu hagualebe ta gue degediyo mei. <sup>17</sup> Damaledo, ege sa Rom kuokou hagua fele, a dugulamou hiyedo kolugi kuhe dugu. <sup>18</sup> A tagalibe, Hiye Ohage uwage sawisie kelegebe, emokou solou do

\* 1:12 1:12 Pol eme didio degei dalali, kuguo kou kuhe nalai.

degeyedili. Yobe nā tewe, a sa Efesuskōu delei kelegene, e a kōu dogōu guo delei kaha degemōu.

## 2

### *Timoti eme Yesu Kelesuha ami o bolodo dalayedei*

<sup>1</sup> Ma dihi, nā neledo dege tafala, Yesu Kelesuha nā habaguguegu kaha degemōu. <sup>2</sup> Godiha ta, a o sudo kediamokōu hehegie tobōu mōu nane dudi keme nā kegenōu fimai dōdo dege o kediamokōu hehegie tobōu ba, Diane o ilo kediamokōu kuhe hehegie tobolou.

<sup>3</sup> Nā hagi dugubabe, nā Yesu Kelesuha ami o bolofei kenou tefele tafalali, eibou de hagi ke hebeleba dabai degemōu ime. <sup>4</sup> Ami o kediage dabai tabou de degele idiyo mei, ami dabainou degele idi, die hiye oha hoho degeyadomou. <sup>5</sup> Nebe, o tae ebukou foukua ile foloba, hebe bolodo molouye. Kenou si foukuayediliya ke i ho fogou babe, hebe bolodo keme e ta molou mei. <sup>6</sup> Hebe hai obou taha dabai hiyedo degeleba, e hebe hai bologuado dia dalali suwi degeibabe, nale segei keme youbukou moubu, o ilo kelebe habage mouyedei. <sup>7</sup> A ke tobou kokou na defeido fimoubabe, Hiye Oha degeiye, na ta kaha sibige ke olou feido tawale.

<sup>8</sup> Nā Yesu Kelesube totou degeda. Eme hiye o Devitha huti. E tolo imou, Godiha haguagi kaha ta uwo bolofei ke a tobou di. <sup>9</sup> A ta ke hehegie tobou di kaha degemou, a hagi hiyedo dugulugi, midihō kasagai milou di o bagama, didio mosodu duwo kuhe. Kenou si Godiha tabe didio degeli mei. <sup>10</sup> Kegemou, a hagi ke gogogulube, o sasai Godiha makai kedia dogou gulamou degeli. Diane Yesu Kelesuha

mamou̇ba, you̇ e hohō kokou̇ tofousogo tofousogo tofou̇ mabadomou̇.

<sup>11</sup> Tȧ koume damaledo tȧ,

Di Yesubou̇ de tofigiei debabe, haba gehe dege ebou̇ de tofolou̇ ile.

<sup>12</sup> Di hagi haguba mou̇ duguo fofoguemou̇ ibabe, di ebou̇ de hiye o degema, sa sa olou̇ fei dia dalaguale.

Dige eme tewe meiyode tobolou̇ ibabe, ege dine tewe meiyode tobolou̇.

<sup>13</sup> Di damaledo kou̇ degeleyodei ke dege ho fogou̇ mou̇ be, enou̇ si you̇ kou̇ degeleyodei keme damaledo degedi.

Yobe, e you̇ e fimai ta bohō diyo mei kaha degemou̇.

*Timoti eme dabai neledo dege degeligi, damaledo Godiha dabai degedi o degeyedei*

<sup>14</sup> Nȧ o sasai kediamokou̇ Godiha tȧ hehegie tobolou̇ be, tȧ a namokou̇ nalolu̇ kou̇ne hehegie tobou̇. Godiha dihile kokou̇ nȧ diamokou̇ egele tobolou̇ be, tȧ sibige mei ta tobolou̇ ba tȧe biyadamabeede. Tȧ kegei kahȧge o ta dogou̇ gulo sagai mei, damaleyodei kenou̇ makodi.

<sup>15</sup> Nȧ Godiha dabai degelebe, midihō dou̇do kenou̇ milou̇ laba dege de, Godiha bolodoyode tobou̇ yadeba. Nȧ damaledo tȧ ke hehegie tobolou̇ be, bologuanou̇ do hehegie tobou̇ de, nȧ Godiha dihile sidifi degeiye deba.

<sup>16</sup> Tȧ kagei kagei, Godiha tagali mei keme nȧ tobekou̇ mugu. Yobe, tȧ kegegai kahȧ degeiyege o sasai kediamē Godi tou̇ fogou̇ fogou̇ yolugi, ahudo degeli kahȧ degemou̇.

<sup>17</sup> Tȧ kasagai diȧ hehegie tobolou̇ idi keme kolo kai do kahȧ

huj tabalemou, tou olou fei makodi ke sagai. O Himeneus dilie o Filetus diliebe ta kasagai kegei kenou hehegile idi. <sup>18</sup> Dilie damaledo ta ke tou fogou mou, ogou gai egei kou gue tobolou idi, Godihage tofigiei o sasai kediamme kou haguagima mei degeiyode tobolou idi kahage, o sasai ilo kedia damaleyodei ke makolo ili.

<sup>19</sup> Kenou si Godiha e moso kaha moutibe kou fofoguema mei degei. Mouti kokou be kou gue nalai dala, Hiye Ohage you e o sasai be olou fei you kou tewe. *Namba 16:5* Nalai tabe kuhe, O koyoha Godiha hu hebele fogubabe, ege midihou doudo mei keme tobekou muguyedei.

<sup>20</sup> Moso hiye kodu melesi sudo ke dalaguabe, sele igi golbou, silvabou deye milou gaiyenou dalagua mei. Haba hebebou, mihibou deye milou gaine dalagua. Ilo kelege bolodo, yoti kelege nale sama nala idi. Haba ilo kelege sibigibou, kokou be nale sadiyo mei. <sup>21</sup> Nebe, o koyoha midihou kasagai olou fei tobekou muguoba, e duledu sibigi olou fei ke igisema mei degeibabe, eme melesi bolodo ke sa degei, moso obou kaha bi bolodo. Hiye Oha emokou dabai nele, you e dabai bolodo ke degeyadeba.

<sup>22</sup> Nage midihou kasagai, o gisiai kedia milou ga idi keme tobekou muguoba, midihou doudo kenou sesele i. Godikou damaleyodema, o sasai tagaleba, amafeinou dala. O sasai, Hiye Oha hu hebele fogulo idi kedia degele idi sagai kenou tefele nane kege dege. Diame die duledube sibigi ta dala mei. <sup>23</sup> O totou degele i kedia ta kasagai tobolou idi keme na hobou duda, nane diabou de tae

biyeiye deba. Ta dia tobolou idi keme sibige meido. <sup>24</sup> Hiye Oha dabai degedi oyege o ilo kelebou de tae biyada, o olou fei kediamokou midihou bolofeinou hehegie de. Haba o tae midihou kasagai namokou milou babe, na hobou gofou degeda, Godiha tanou bologuado hehegie de. <sup>25</sup> O ta dudiyo mei kediamokou be, nage amafei hehegiemou i. Kegeibasi, Godiha degeiye, die fi boholou ba, damaledo tadade tawale ile sa degei. <sup>26</sup> O kegele i kediam Tamaha tou dalagua, you tagali sagai kenou degemabadomou. Damaledo ta ke duloba, fi bohou basi, Tamaha salemaiye tou dala ke tou fogou ba kama fosigile.

### 3

*Uwage sabiyamou ile kelegebe, o sasai sudo midihou kasagai milou ga ile*

<sup>1</sup> Na kounou tawa, uwage sabiyamou ile kelegebe, hagi hiyedo dugumou ile. <sup>2</sup> Hagi keme, o sasaiye midihou kasagai hiyedo milou ga ile, yousienou tagadi midihou, sele tagadi midihou, you e hu hiye degemou, enou si tewe oyodedi midihou, o sasai huyafei degedi midihou, aye adiou ta dudiyo mei midihou, bolofeyode tobou diyo mei midihou, Godiha midihou dafa idi midihou kegele i olou feido. <sup>3</sup> Dia o sasai tagale ile mei. O tae diamokou hagi neibabe, diage ta gebe meiyodele ile mei. Midihou dia milou ga ilebe, tobe tobou di midihou, tou e tagadi midihou kasagai ke akogudiyo mei midihou, o wodi midihou. Midihou bolou ke ta tagale ile mei. <sup>4</sup> Yogo ho o kediamokou sesegudi midihou, totonou gofou degedi midihou, esi bolodade tawadi midihou

kenou milou ga ile. Kegele iligibe, Godi tagale ile mei, sa sibige o sasaiye degedi midihō kokou nou hohō degele ile. <sup>5</sup> Mogouyenou Godiha midihō milolou yode tobolou ile, kenou si Godiha dedei ke dia ta tawale ile mei. Na o kegele i kediabou de siada.

<sup>6</sup> O kegele i kedia moso ta moso ta amafei ya fologa ogou ga tobou mou be, sasai totou degele i kediage die ta dulomou sesele idi. Yobe, sasai kegele i kediame midihō kasagai milou gai kaha hagi hiyedo dege dalaguali, midihō kagei kagei, sibige mei kenou tagale idi. <sup>7</sup> Sasai kediage ta gehe gehe kenou tawalamou degele iligibe, damaledo ta keme ta tawale idiyo mei. <sup>8</sup> Afu kelege, o Janes dilie o Jambres dilie Moses akogu\* sagai kenou tefei, ogou gai egei tobou di o kediame ta damaledo ke akogulo idi. O kegele i kediame totou degele inou. Godiha die damaleyodei ke tefele dugube, dia olou fei mihikou fiyasigeimou dugu. <sup>9</sup> Ogou gai egei kamahage, sa sa olou fei tefele sagai mei. Yobe, o sasaiyege ogou gai egei tobolou idi o kedia tabe totou degei tadade tawale ile kaha degemou. Afu o sasaiye o bolou dilie ta totou degei ta ke tobolou imou dulo tawale i sagai kegenou tawale ile.

*Timotihage Godiha tabe neledo dege tou yedei*

<sup>10</sup> Nanou si ta a hehegiedi keme kou tewe. Midihō olou fei a milou gadi kene na kou tewe. A degelamou degeli kebou, a damaleyodei kebou, dabai degele dafadiyo mei kebou, a o sasai tagadi kebou olou feibe na kou tewe. A hagi mou duguogou di kene na kou tewe.

\* 3:8 3:8 Kisim Bek 7:22, 9:11



<sup>11</sup> Sa Antiokbôu, sa Aikoniambôu, sa Listrabôu kele tie o kedia a makolamôu degele i.\* Hagi hiyedo a dugumôu haguei olôu fei keme na kôu tewe. Kenôu si Hiye Ohâ a dogou gumôu, a teli mei dala kuhe. <sup>12</sup> Damaledo, o Yesu Kelesubôu de dalali, Godihâ midihô ke milou gômou be, o keme oe makolamôu degele idi. <sup>13</sup> O midihô doudo mei milou ga idi obou, ogou gai egei tobolou idi obou olou fei kedia midihô dia milolou idi keme hiyedo degeli. Dia omokou ogou ga tobolou imou be, haba obene diamokou ogou ga tobolou idi.

<sup>14</sup> Nanou si, ta na dulomou damaleyodei keme defeido tolou dala, na hehegiedi o eibe nou kou tewe kaha degemou. <sup>15</sup> Ta Godihâ kuguokou nalaga i keme name dihi huyadefei kelege yoma tawagamou hagulugi, ifi na tewe, name Yesu Kelesukou damaleyodei kaha degemou, Godihâ na mamolou. <sup>16</sup> Duo Bolofehâ degeiye, Godihâ ta, kuguokou dala olou fei ke o kedia kuhe nalaga i. Godihâ kuguo kaha dabaibe kou gue, o sasai hehegiedibou, midihô kasagai ke doususudibou, egele tobou dibou, haba doudo midihô olou fei ke hehegie tobou dibou de. <sup>17</sup> Kegei degemou, Godihâ ta kaha degeiye, you e dabai degele idi o di midihô bolodo olou fei ke defeido tolou ba, dabai bolodo olou fei ke kuhe degega ile.

## 4

*Timotihage Godihâ tabe neledo dege hehegieyedei*

---

\* 3:11 3:11 Dabai 13:14-14:20

<sup>1</sup> Yesu Kelesuha haguaba, sa sibige kou wolou dalali, o sasai teli mei sosou dalaguabou, tofigieibou de ta sale. Kegei kaha degemou, age Godibou Yesu Kelesubou dilie dihile kokou a namokou neledo dege tobolou kuhe. <sup>2</sup> Nage Godiha tabe o egei duyo meibou, egei dulo hoho degeli obou kediamokou defeido hehegie tobou. Na hehegie tobolou be, midihog kasagai milou ga idi ke douususuloba, dedei sasagie tobou de. Na dabai degelebe hobou dafada. Godiha ta defeido hehegie tobolou dala. <sup>3</sup> Damaledo, habagebe, o sasai kedia Godiha ta doudo ke dulobe dafa ile. Ta diou tagali sagai kenou dulaba, dia hehegiedi o sudo hagnosisouba haguasie, sa sibige ta gehe gehe ke hehegieiba dulo ile. <sup>4</sup> Dia ta damaledo ke tobekou muguoba, ta sibige mei kenou dulo sagai degele ile. <sup>5</sup> Nanou si defeido fimaba, fi gofoudo dege dabai dege. Hagi dugubabe, dafada. Ta uwo bolofei ke damaleyodili mei o sasai kediamokou hehegie. Damaledo, dabai olou fei Godiha namokou tobolou keme dege.

*Pol e tolo hafei degei*

<sup>6</sup> A namokou Godiha dabai defeido degeyede tobolou kaha yobe kou gue, ame tolo iladi. Ame Godikou tigi kolo huei gofoudo ke sou gudi\* sagai kenou tefele, ma kafei kege sou guba, a fogou ile. <sup>7</sup> O tae ebukou fokua ile folodi sagai kenou tefei, ane abukou tofou mou hagulugi felei, a Yesu Kelesukou damaleyodeibe tou fogou li mei dala kuhe. <sup>8</sup> Kegemou, uwage sawisiale kelege, hebe bolodo a molou dala keme Hiye Oha amokou neleba tobolou, age name

---

\* 4:6 4:6 Namba 28:7

doundo o dalamou duguyodele. Ta sai fidi o doundo kaha amokou ke tobolou kegenou be, haba o olou fei e haguale ke dia dalaguadi kediamokou ne kegenou tobolou.

*Timoti e Polkou toto haguayedei*

<sup>9</sup> Na amokou toto haguale dege. <sup>10</sup> Yobe, o Demasha a tou fogou, sa Tesalonaikakou fogou i, eme sa sibige kumaha midihou kenou tagali kaha degemou. O Kresens ene sa Galesiakou fogou imou, Taitusne sa Dalmesiakou imou dei. <sup>11</sup> Lukhanou si abou de dala. Na Makne wolou hagua, yobe esi a dogou guo Godiha dabai degele sagai kaha degemou. <sup>12</sup> A o Tikikus tobou mou sa Efesuskou i.

<sup>13</sup> Na hagulugi, sa Troaskou feleba ma yukuei sasado, o Karpusha mosokou fogou ke malaba kuhe hagua. Ma kuguone mouma hagua. Ilo kelebe wai sipsip kolo kokou nalagai kene mouma hagua. Totou degeda.

<sup>14</sup> Sele igi kopa dabai degedi o Aleksanderha amokou midihou kasagai hiyedo milou kaha degemou, Hiye Oha emokou hebe kasagai ke nele. <sup>15</sup> O kokou be nane nou tawaibou, e gofou degemou, ta da hehegedi ke akogu kaha degemou.

<sup>16</sup> A ta sai kokou yoma ta tobou kelegebe, ame masofei delei, o taha ta a dogou guo ta tobou li mei. O olou fei a tou fogou yai. Godihage keme mou duguo fogou babe bolo. <sup>17</sup> Kenou si Hiye Oha abou de dogou guo tafalali, amokou dedei sasagiei, a e ta olou fei ke tobou ba, sa sa o sasai kedia dumabadomou. Hiye Oha a dogou gumou, ame fuse hiyedo laionye ta woumou teli mei dala kuhe. <sup>18</sup> Midihou kasagai milou ga idi o kedia a walaba degeibabe, Hiye Oha

a dogôu guo malâ ile hebenitôu wolôu dalale. Di emokôu hohobolôu nôu dalame. Damaledo.

<sup>19</sup> Na Prisila dilie, e ma Akwila diliebôu, Onesiforusha sosôu bôu diamokôu agali bolofeyode tobôu. <sup>20</sup> O Erastusbe sa Korinkôu nôu kege delei. O Trofimus eme sa Miletuskôu do tilamôu a kuhe fogôu haguei. <sup>21</sup> Na toto haguababa dege, kuliobôu wi hiyedobôu haguaba na akoguye deba.

O Yubulusbôu, o Pudensbôu, o Linusbôu, sasai Klo-diabôu, damaleyodele i o sasai bôu dia namokôu agali bolofeyode tobolôu ili kuhe.

<sup>22</sup> Hiye Ohâ nabôu de dalale. E habagugueibe nibôu de dalale.

Godihā Tā Bolofei

Konai: Godihā Tā Bolofei New Testament

Nupela Testamen long tokples Konai long Niugini

copyright © 2014 Wycliffe Bible Translators, Inc.

Language: (Konai)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 28 May 2022

8c47cab8-fc6e-524e-936f-c52eba70db94